

■ CONVIVENZA

Salidar è il «Knigge» dals vitgs

DA BETTINA CADOTSCH*

Chau, bun di u hallo – plets che nus tuts u din mettain mintga di. Era sch'i sa tracta mo da plets fitg simpels tradeschan quels en mes eglis ina buna part davart in uman. A mai pari numnadamain ch'i dettia bleras persunas ch'han fadia da vegnir cun in «chau» sur las lefzas sch'ellas èn ordaifer lur zona da confort, pia betg en il ravugl da lur collegas u da lur famiglia.

Jau sun in uman che salida. Jau salid era gugent ina giada dapli che memia pauc. E pertge? Perquai ch'i na fa betg mal, perquai ch'ins na perda nagin piz da la curuna e perquai ch'jau hai survegni la maniera da salidar gia da pitschna da mes geniturs: Salidar en in vitg u or en la natira tutga simplamain tar il «Knigge», tuttina sch'ins enonuscha in l'auter u betg. En citads u lieus pli gronds è quai sa chapescha auter: L'aria da la citad fa pli libra e pli anonima. Per consequenza na salid'ins era betg la glied sin via. Per mai è quai ina teoria simpla ch'jau n'hai mai mess en dumonda.

Ma sch'jau sun en vischinanza da mes dachasa sun jau tranteren fitg surstada quanta glied



ch'ha fadia da salidar. Prest adina cura ch'jau vom a spass cun il chaun ubain a far vitaparcours ed entaup glied hai jau da questas situaziuns. Pli gugent vegn guardà dretg or e salidà mo cun in marmugn, sch'in-summa. Gugent savess jau sche quels umans èn simplamain surds u bornads u sch'els èn uschè perplex ch'ins als salida ch'els na san betg co reagir. Savens èsi turists, forsa che quels na san pigliar a mauns in-summa nagut cun in «chau», betg idea. Ma betg che vus crajais ch'i saja sullettamain ils giasts che na salidan betg, er auters pararan d'avair bregias pli grondas cun questa chausa.

Qua fissan per exempel ils «giuvenils dad oz». Ad els na vegni betg darar fatg reproschas ch'els n'han naginas manieras pli e ch'els na salidian betg la glied. Jau chat ch'ins na dastga però betg bittar tuts

en la medema chazzetta, jau enonusch blers che salidan senz'auter. Tenor mai n'è quai betg il problem dals giuvens, mabain da lur geniturs. Sch'uffants e giuvenils han fadia da salidar la glied n'han els mettain betg emprendi quai da lur geniturs. Per consequenza sa sviluppa alura plaunsieu ina tscherta retegientscha ed els na san betg co sa deputtar endretg. Per gea betg far insatge fauss na din els il pli gugent nagut u spetgan fin ch'insatgi auter als salida l'emprim.

Jau sai, atgnamain tuna questa entira chausa dal salidar in pau absurd, igl è gea propi mo in pèr simpels plets. Ma en ils vitgs eran ins pli baud bain anc losch dad esser en in rom, en il qual ins salidava in l'auter, u betg? A mai fa glied ch'ha bregias da salidar – tuttina sche quai è uss uffants u creschids, indigens u turists – simplamain in'impresiun malsegira. Perquai stoss jau dir: Jau sun in fan da glied che salida, da glied ventiraivla ed jau chat bel ch'i dat tuttina anc blers ch'han emprendi quest «Knigge» e ch'els dastgan dir chau, bun di e hallo a mintgin.

* Bettina Cadotsch è creschida si a Savognin. Ella studegia Multimedia Production a la Scola auta da tecnica e d'economia a Cuira e lavura tar Radio Südschweiz e «suedostschweiz.ch».